



弁州山人四部稿卷之一百六十五

吳郡王世貞元美著

說部

宛委餘編十

三皇本紀天皇氏兄弟十二頭也各一萬八千歲地

皇十一頭各一萬八千歲人皇九頭分長九州合一

百五十世爲四萬五千六百年項峻始學篇云天皇

十三頭號曰天靈治一萬八千歲徐整三五歷記云

一人十三頭也又地皇興於熊耳龍門山人皇九頭

兄弟各三百歲分居九州此以爲荒唐未敢信然至

晉宋紀各稱毗騫王從古以來不死則至於今當尚在也

人壽至百歲而極彭祖七百餘歲自服僊丹後入流沙亦不言死帝王世紀神農在位百二十年黃帝少昊俱在位百年帝嚳年百五歲堯年百一十八舜年百有十禹湯年俱滿百六韜云文王祖古公壽百二十王季百歲文王九十七武王九十三周穆王五十卽位在位五十五年蓋世壽也太公年百三十六召公百八十畢公年亦百餘漢文帝時有樂人竇公者亦年百八十漢張蒼拜相封侯年百餘歲魏范明友

奴二百四十歲晉范長生兩仕蜀前後百年魏羅結百七歲爲外都大官百二十乃卒梁穰城人年百四十歲唯飲乳鍾離人顧思遠年一百十二歲凡九娶有子十二人死亡略盡召爲散騎侍郎亦至百二十而卒上津人張元始年一百十六歲膂力過人進食不異九十七始生子遂無影唐有李元爽者百三十六歲開元東封太原于伯龍一百二十八歲宋党翁百七十餘歲譙定百三十歲瓊州楊叔連百二十二父宋卿百九十五九世祖不語不食不知其年竹書紀年所載諸公之壽有可攷者顓頊三十一年

集州山人稿卷之百六十五
世經堂刻
產伯鯨又四十八年而陟爲高辛氏六十三年又至
堯六十一年而鯨治河年百七十二歲矣堯六十九
年而黜蓋百八十歲也桀十七年商使伊尹來朝三
十一年桀亡又十二年湯崩湯與尹年相等外丙元
年小庚五年小甲十七年雍已十二年仲壬四年太
甲元年而伊尹放太甲桐宮七年而伊尹亡距湯亡
三十餘年計尹之壽亦可百三十矣紂三十一年西
伯得呂尚以爲師年八十又二十一年而紂亡又五
年而武王陟又三十七年而成王陟康王六年而太
公薨壽一百五十二也吳地記諸樊在位十四年餘
濟十七年餘昧二十一年僚十三年闔閭在位二十
年夫差二十三年夫差將敗之數年延州來季札救
陳去讓國之歲不下百年則三代人臣之壽未有如
四公者也然攷左傳壽夢卒襄二十一年去哀七年
實七十七年耳其三公紀年攷之正史亦未盡合然
要之在百歲外也

鄆滿長狄僑如之弟焚如簡如以宣二年攻齊衛被
殺計其時僑如當四十餘矣又一百二年而僑如死
於魯東門壽亦將百五十矣魏拓拔主稱神元帝者
百四歲高麗王康年百餘吐谷渾王夸呂即位後自

稱可汗者百年皆夷狄主也宋史日本國有大臣名紀武內者年三百七歲尤為異聞

文武以後人主眉壽之高者周穆王百五歲梁武八十六宋高宗八十一元世祖八十唐玄宗七十八唐高祖漢武帝及我

太祖俱七十一

人主享國之久者周赧王五十九年周穆王漢武帝俱五十五年周平王五十一年梁武帝四十九年周顯王四十八年周宣王唐玄宗及我

世宗俱四十六年

秦莊襄王齊景公五十九年

宋高宗在位三十一年為太上皇二十五年

即帝王位之晚者武王八十七宋高祖六十四唐明

宗六十一混一之晚者元世祖六十三

大臣老居位者伊尹太公畢召外若張蒼范長生夾谷

吾里補俱近百歲為丞相國公百餘歲卒羅結百十二

歲始以外都大官致仕衛武公九十五而為周卿士

鬻熊九十而為文王師高允九十為中書令九十八

以左光祿大夫來敏九十七以執慎將軍呂岱九十

六以大司馬李先九十五以內都大官司馬孚九十

三以太宰都督中外諸軍士燮九十三以交州牧王

盤九十二以翰林學士劉寔九十一以太尉張儉以太
師夏侯勝九十以太子太傅楊統九十以光祿大夫卒
張萬福八十餘以工部尚書致仕九十卒食祿七十年
未嘗一日病王裕之八十八以左光祿大夫開府儀同
三司王起八十八以左僕射同平章事山南西道節度
使卒郭丹八十五以司徒罷郭伋八十五為華州牧
明年以太中大夫卒王祥八十四以太保睢陵公致
仕明年卒郭子儀八十五以尚父太尉中書令汾陽
王趙燾八十四以太傅張儉八十四以衛尉卒史浩
八十四以太保魏國公致仕八十九以太師卒喬行
簡八十五以少傅平章軍國重事乞祠八十六卒趙
克國八十餘以後將軍營平侯罷就第八十六卒張
皓八十三以廷尉罷貢禹八十二以御史大夫胡廣
八十二以太傅錄尚書事卒蔡義拜丞相已八十餘
董昭八十一為司徒張昭八十一為輔吳將軍公孫
弘韋賢俱八十以丞相陶侃長孫嵩俱八十以太尉
卒韋安石八十以左僕射始為亂兵所害太傅鄭袤
食祿六十餘年其它未可悉紀

宰相秉政之久者漢蕭鄼侯何漢元年為丞相進相
國至惠二年卒凡十四年張北平蒼文帝前四年為

丞相至後四年免凡十四年霍博陸光以後元二年
爲大司馬大將軍秉政至地節二年卒凡二十年王
陽平鳳以竟寧元年如光官秉政至陽朔三年卒凡
十一年吳廣平漢以建武元年爲大司馬豫政至二
十年卒凡二十年曹太祖操以建安三年爲司空擅
政至進丞相魏王卒凡二十五年諸葛武鄉亮以章
武元年爲丞相秉政至建興十一年卒凡十四年晉
王始興導以建武元年爲驃騎將軍錄尚書事進司
空司徒太保丞相以咸康五年卒凡二十二年謝廬
陵安以寧康元年爲僕射秉政進衛將軍太保以太

元十二年卒凡十二年劉高祖裕以義熙四年爲開
府儀同三司錄尚書事擅政進太尉太傅相國宋王
至永初元凡十三年宋劉彭城義康以元嘉六年爲
司徒秉政十七年以大將軍出督凡十二年魏長孫
北平嵩以天興元年爲司徒輔政進太尉柱國大將
軍以太延元年卒凡四十年高神武歡以中興元年
爲太師大丞相擅政天平十二年卒凡十六年宇文
太祖泰以太昌三年爲丞相擅政齊王廓三年以太
師大冢宰卒凡二十三年隋高齊公頰以開皇元年
爲左僕射輔政至罷凡十九年唐房梁公玄齡以貞

觀元年為右僕射輔政進司空至卒凡二十一年李
晉公林甫以開元二十三年同中書門下三品擅政
天寶十載以左僕射右相文部尚書死凡十九年元
進賢載以寶應元年同中書門下平章事秉政大曆
十二年誅凡十六年宋秦申王檜以紹興八年右僕
射同平章事再擅政進少保太師以二十四年死凡
十七年史衛王弥遠以嘉定元年為右丞相樞密使
擅政進少師太傅太師以寶慶六年卒凡二十七年
賈魏公似道以開慶元年為少師右丞相樞密使擅
政進太師平章軍國重事德祐元年竄凡十七年此
皆首尾在政府者也

若霸國之相無過於管仲魏冉者管仲以桓公元年
執齊政至卒凡四十一年魏冉以昭襄元年為將軍
執秦政封侯至十二年為相至罷凡三十六年
白起以昭襄十三年為大將至五十年而罷凡三十
七年廉頗以趙孝成王十六年為大將四十年悼襄
王元年奔魏

凡出入將相最久者絳侯周勃從入漢為威武侯相
國太尉再為丞相就國凡三十四年潁陰侯灌嬰為
昌文侯御史大夫車騎將軍太尉丞相凡三十年酈

濟數將兵有功不當侯十二年用父食其故封高粱侯凡六十三年張北平蒼以代相封侯爲計相四歲淮南相十四歲御史大夫六歲丞相十四歲比卒凡五十五年司馬宣王自撫軍大將軍受遺輔政進太尉太傅大都督凡二十三年司馬孚自司空至太宰三十年桓南郡溫自都督荊州平蜀進開府太尉大司馬都督中外諸軍錄尚書事楊越公素以御史大夫爲行軍元帥僕射尚書令司空司徒太子太師出入將相俱二十七年劉江夏義恭自都督荊州進司空司徒錄尚書太尉太保太傅領大司馬太宰三十

四年長孫趙公无忌以尚書左僕射罷政爲開府司空後去尚書門下省加司徒太子太師後同三品加太尉檢校中書令知門下省加太尉任公輔者三十六年李英公勣初授大將軍至左僕射司空太子太師出入將相垂五十年郭汾陽子儀以使相進司空司徒副元帥尚父太尉二十六年滿中書令二十四考裴晉公度四爲同平章事三建節一留守官司司空司徒侍中中書令凡二十五年錢吳越王鏐建鎮海鎮東節加太尉太師中書令尚父天下兵馬大元帥凡四十年張齊王全義自河南尹建節加太師尚書

令天下兵馬副元帥凡四十年馬楚王殷建武安四鎮節加太師天策上將凡三十八年趙韓王普三爲首相三建節一爲西京留守左僕射太子太保少保司空司徒侍中太保中書令凡二十九年文潞公彥博再爲首相一平章軍國一首元樞五換節領兩鎮加侍中司空司徒太尉太師垂五十年蔡魯公京自左僕射入凡五拜相一爲司空太尉太子少師太子太師再授太師領三省事凡二十三年史魏王浩一爲右僕射右丞相樞密使三領祠加少保少傅太保太師凡三十二年安童三爲中書右丞相一鎮北邊垂四十年

夏侯嬰爲太僕事四主二十九年于定國爲廷尉十八年

宋閩人蔡伯侏三歲應薦真宗授秘書正字歷州郡至八十以列卿致仕食祿七十七年而無可紀孝宗朝呂嗣興四歲授右從政郎皇孫榮國公伴讀後亦無聞

佩六國相印者蘇秦五國相印者犀首六國上將者公子無忌五國上將者項籍

漢世五爲三公者胡廣四爲三公者楊賜三爲三公

者黃瓊楊彪唐五入相者蕭瑀裴度崔胤四入相者
常巨源姚崇常安石三八相者武承嗣武攸寧豆盧
欽望武三思李嶠李懷遠崔湜劉幽求張說張延賞
王鐸鄭畋

五季三八相者馮道

宋五入相者蔡京三八相者趙普呂蒙正呂夷簡張
士遜文彥博

昔人以馮道比胡廣蓋言其邁際行履之同也漢順
帝五年胡廣已爲尚書僕射又十年而以太司農爲
司徒質帝元年梁異弑帝爲太尉桓帝元年罷十月
爲司空五年致仕又四年以太常爲太尉又二年梁
異誅爲庶人又八年以太常爲司徒又二年爲孝靈
元年參錄尚書事其年宦官殺陳蕃等進太傅錄尚
書事封又四年卒凡事和順質冲桓靈六帝周流四
公三十餘年馮道始事唐莊宗莊宗爲明宗所篡事
明宗三年由端明殿學士爲中書侍郎同平章事廢
帝爲潞王所弑事潞王以司空平章出鎮義成石晉
滅潞王四年入爲司徒侍中出帝初以太尉侍中鎮
匡國契丹滅晉爲太傅漢入洛爲太師周篡漢以太
師爲中書令瀛王凡五國十一主出入將相三公者

二十四年

馮道作長樂老敘爲千古譏笑之端固也其時有竇
貞固顯唐莊宗朝爲石晉學士漢司空首揆周加司
徒侍中以迄罷相至宋用前三公赴闕陪位乞以東
宮三少奉朝請不得歸洛卒年七十八自爲墓志張
昭事王師範義不臣梁事唐莊宗勸張憲以死節而
身後倍之歷後唐晉漢周皆顯官以至宋祖至吏部
尚書封陳國公宋琪爲契丹進士事漢周及宋拜相
兩朝王易簡舉梁進士至周顯德位太子少保宋初
加少傅三公壽俱七十九琪又作多幸老民敘易簡
構一鳴堂二品樓蓋不爲長樂之見者少矣

顓頊十歲而爲少昊相帝嚳十五而爲顓頊相唐堯
十五而爲帝摯相甘羅十二而爲秦上卿介子推十
五而爲楚相帝康成十五而爲郡主簿司馬元顯高
澄俱十六開府輔政崔英十七而爲符秦諫議大夫
子竒十八而爲齊東阿守張緬十八爲漢淮南守賈
誼十八爲博士終軍二十爲謁者俱有聲

安童二十一爲丞相董賢二十二大司馬劉義康二
十三爲司徒錄尚書事劉休仁爲司徒尚書令霍去
病二十四爲大司馬鄧禹爲大司徒蕭子良元勰二

十六爲司徒錄尚書事安童子兀都帶亦以二十六爲大司徒宇文泰二十七爲丞相高岳爲太尉高澄太師錄尚書事脫脫爲中書右丞相王儉二十九爲僕射秉政又六年拜開府伯顏三十爲中書左丞相廉希憲三十爲中書平章政事王溥三十二爲平章事范宗尹三十二爲右僕射張俊三十一爲元樞若衛青之拜大將軍長孫无忌之拜僕射當亦僅三十餘也中有宗室諸王然實秉政著聲稱者始記之苟羨以二十九爲比府中郎將監青徐諸軍事稱中興諸將未有如其少者謝晦三十五都督荊州而有

矜色其兄瞻以苟中郎譏之晦大慙然荊州重鎮而晦以執政出督官爲衛軍三司之亞非羨比也若其至少者齊王憲十六爲益州總管霍去病十八爲嫖姚校尉出塞有功封侯塔思爲行省國王破金鄧禹二十三拜前將軍定關中大都督賀拔岳被禍僅二十六而宇文泰代之爲二十五唐洛州總管淮陽王李道玄行軍總管郟國公羅士信各死事道玄僅十九士信二十而盧祖尚拜光州總管杜伏威拜東南道大行臺吳王俱二十三李世勣以黎陽來歸拜大將軍封英公亦僅二十六然則苟羨之二十九固不

足道也

後漢以三公爲真相唐以平章事爲真相四代至三公者漢楊震子秉秉子賜賜子彪俱拜太尉爲上公賜雖以司空終獨封侯三代三公者太尉安國亭侯袁賜子司空逢逢子太傅隗三代拜相者唐中書令河東侯張延賞左僕射同平章事魏郡公延賞中書侍郎同平章事高平侯弘靖此外雖蕭氏之八葉亦未有的傳至三世者若司馬太傅懿相國昭相國炎錢太師鏐元瓘俶皆可以稱三世三公然權政強藩非繇勛德

父子配享廟庭者唐太師西平王李晟太尉涼國公李愬宋中書令濟陽王曹彬侍中瑋尚書令魏郡王韓琦太師儀國公忠彥若父子俱爲宰相或大將位望俱極隆重者商宰衡伊尹左相陟漢丞相絳侯周勃丞相條侯亞夫吳丞相荊州牧婁侯陸遜大司馬荊州牧婁侯抗北齊左丞相咸陽王斛律金左丞相咸陽王光唐太尉中書令西平王李晟左僕射涼國公愬其次則韋賢玄成李邵李固袁安袁敞王龔王暢蘇瓌蘇頲韓休韓滉李吉甫德裕韓琦忠彥呂夷簡公著之類差亦可紀

宋石守信以檢校太師使相領陳州節年五十七卒
於鎮子保吉歷中外亦以檢校太師使相領陳州節
年五十七卒於鎮守信贈尚書令保吉贈中書令可
稱奇事

父子同時在大位若為三公者漢右將軍上官桀驃
騎將軍安從公大司馬大將軍霍光右將軍禹大將軍

耿況大將軍奔相國司馬昭開府儀同三司炎從公晉

太宰司馬孚大司馬望太傅司馬導子開府儀同三

司元顯宋太傅蕭道成開府儀同三司贍魏太師馮

熙司徒誕太師元繼開府儀同三司義太師大丞相

高歡大將軍澄北齊左丞相斛律金太保光後唐中

書令趙德鈞侍中延壽同公吳太尉徐知誥司徒景

通宋太師尚書令錢俶檢校太師侍中惟濬太師蔡

京太保攸太師秦檜少師熺元太師月赤察兒太保

塔剌海少子太師瓜頭与父同太保馬札兒台右丞

相脫脫

父子對秉機政者晉王渾為尚書左僕射濟為侍中

治門下省吳紀亮為尚書令子隲為中書令導子元

顯俱為錄尚書事時稱東錄西錄蔡京領三省事秦

檜為尚書左僕射馬札兒台為中書右丞相攸熺脫

脫俱知樞密院事

父居大藩而子秉政者高歡以大丞相行臺晉陽澄以中書監京畿大都督秉政徐溫鎮金陵知訓知誥先後秉政趙德鈞鎮盧龍延壽以樞密使秉政月赤察兒爲行省右丞相鎮和林而塔剌海瓜頭相繼以中書右丞相秉政

父子同建節者郭汾陽朔方子晞邠寧行營節宣武韓弘河陽公度魏博田弘正河陽布盧龍趙德鈞忠武延壽延壽爲隨駕行營都部署而德鈞爲東北面行營都統淮南錢俶山南東道惟濬其他若錢鏐之於傳瓘馬殷之於希聲建節於父國者不論也

父子同時封王公侯者自宗室外昌黎王馮熙南平王誕魯國公蔡京燕國公攸益國公秦檜嘉國公熺各自以恩澤封義陽王陸侯東平王麗舒國公李昱英國公世勳東光侯耿况好時候弁婁侯張昭都鄉侯承宣城侯諸葛瑾都鄉侯恪各自以功猷封父子丞相周勃子亞夫韋賢子玄成曹操子丕斛律金子光史浩子彌遠

父子太師王舜子匡史浩子彌遠月赤察兒子瓜頭馬札兒台子脫脫明則張輔張懋

父子天策上將軍楚王馬殷子希範

父子狀元者獨宋梁顥及固耳本傳止言甲科考登科錄記之按遜齋閒覽梁顥八十二歲雍熙二年狀元及第其謝啓曰皓首窮經少伏生之八歲青雲得路多太公之二年容齋四筆云以國史攷之梁公雍熙二年廷試甲科景德元年以翰林學士知開封府暴卒年四十二朝野雜記謂顥登第年才二十二胡鴻臚真珠船謂宋史顥卒九十二溯其登第時乃七十三非八十二又謂雜記乃固登第之年此大可咲非宋史九字為四字之誤則狃於遜齋閒覽之說也

按雍熙二年乃太宗太平興國八年以後改號也據本傳父文度早世顥養於叔父時王禹偁舉鄉貢顥依以為學嘗以疑義質於禹偁禹偁拒之不答顥發憤讀書不期月復有所質禹偁大稱賞之禹偁以太平八年舉進士於顥差為前輩今據閒覽真珠船所云則顥之少孤當在沙陀石晉之際而長於禹偁且四十餘年矣其不相應一也顥若果九十有二豈使之為翰林學士又使之權知開封而暴卒耶其不相應二也子固以大中祥符元年甲第僅二十三顥卒時十八耳而又有第述及適相仁宗朝至熙寧三

年卒年七十去景德元年顯卒時僅三歲耳顯七十
五而得固九十而始得適其不相應三也顯以四十
二歲卒固以三十三歲卒於事理甚明中間顯所歷
官皆繁劇其上封事無老人意史又稱其美風姿強
力少疾於遜齋之說有毫髮類耶洪文敏在內制久
其見國史甚真與朝野雜記之言同真珠船又似夢
中說夢矣

宋諫議大夫贈太子少師陳去非長子右僕射前同
書門下平章事樞密使贈侍中謚文忠堯叟次太子
太師前同中書門下平章事贈司空侍中謚文惠堯
佐天雄節度使贈太尉謚康肅堯咨一相中書一長
樞密一為侍從俱登甲第而堯叟堯咨復第一俱建
節徽猷閣學士謚忠宣洪皓長子尚書右僕射同中
書門下平章事謚文惠適知樞密院謚文安遵端明
殿學士謚文敏邁父子兄弟俱登制科知制誥而皓
以徽猷適以觀文遵以資政邁以端明俱學士終二
家極為相類

叅知政事太子少師謚忠獻韓億子尚書左僕射同
中書門下平章事司空贈太傅謚獻肅絳門下侍郎
太子少師維尚書右僕射中書侍郎太子太保贈司

空績兩為宰相兩為執政樞密使侍中贈中書令謚武惠曹彬子河陽節度使同平章事贈中書令謚武懿燦彰武節度使贈侍中瑋定國軍節度使贈侍中謚忠恪琮兩登樞宥兩列環衛分贈兩省之長億八子彬七子餘各有顯宦可為文武之極致而亦相類○郭尚父子儀以司徙中書令關內河東副元帥河中尹靈州大都督單于鎮北大都護朔方節度關內支度鹽池六城水運大使押蕃部并營田及河陽道觀察等使汾陽王冊拜太尉贈太師謚忠武八子顯者四太子少保代國公曜太子賓客趙國公晞太常

卿代國公駿金吾大將軍祁國公曙李西平晟亦以司徙中書令鳳翔隴右涇原節度使營田觀察處置筆使兼行營副元帥西平王冊拜太尉贈太師謚忠武十三子而顯者亦四河中節度使愿嶺南節度使憲魏博節度使平章事涼國公愬河中節度使太子太保聽西平功名壽考差亞於汾陽而四子則小勝與汾陽埒者太尉侍中臨淮李武穆王光弼功名雖盛而晚誠有差與西平埒者司徙侍中北平馬莊武王燧功烈忠猷皆不及也武穆一子彙至涇原節莊武二子一亦曰彙蚤卒一曰暢至少府監而其後俱

不振

唐右拾遺竇叔向有五子祭酒常司業牟中丞羣刺
史庠中丞鞏五季諫議大夫竇禹鈞有五子尚書儀
侍郎儼補闕侃叅知政事偁起居郎僖二家名位才
望俱相等今人但知有燕山而不知有補闕也

兄弟状元自陳堯叟堯咨外有孫何孫僅制科蘇軾
轍軾入三等轍四等宋祁廷試第一兄郊第三而唱
名太后改郊第一亦可稱兄弟状元矣

魏太尉穆崇子太尉觀尚宜陽公主觀子征東大將
軍中書監壽尚樂陵公主壽子中書監平國尚城陽
公主平國子中書監羅尚新平公主羅子尚書令司
空亮尚中山公主亮子開府中書監紹尚瑯琊公主
凡六世尚主諸昆季尚主者又十餘人七世掌機密
四為三公二代封王古所未有

三尚公主者宋彭城王劉昶仕魏至大將軍前後尚
武邑建興平陽凡三公主主三嫁駙馬者唐定安公
主初嫁殿中監王同皎次嫁衛尉少卿韋濯三嫁太
府卿崔銑齊國公主始嫁太常卿張垆次嫁裴潁三
嫁楊敷寧國公主初嫁鄭巽次嫁薛康衡三嫁迴紇
英武威遠可汗

武相元衡與李相吉甫同年生以同日拜相武以御史中丞遷門下侍郎李以中書舍人遷中書侍郎俱同中書門下平章事武出鎮西川明年李出鎮淮南久之李復入為中書相武以次年十月復入門下相李以又次年十月卒卒之日為武生日武以又次年十月殞盜其日亦李生日

秦國錢忠懿王徽生一甲子以八月二十四日生亦以八月二十四日卒又與父元瓘卒日同

宋曾丞相布以卯年卯月卯日卯時卒韓丞相絳以辰年辰月辰日辰時生韓發解南省殿試皆第三以熙寧三月三日卒人尤異之金有田轉運時秀者所居里名半十行第五以五月五日生小名五兒年二十五應鄉府省殿四試俱第五名年五十五以八月十五日卒造物之巧如此

官名有極貴而極繁者聊志其一二唐有回天再造竭忠守正功臣太尉檢校太師中書令諸道兵馬元帥判左右神策六軍十二衛事護國宣武宣義忠武四鎮節度管內觀察處置營田等使鹽鐵度支戶部三司都制置等使解池榷鹽使梁王朱全忠宋有開吳鎮越崇文耀武宣德守道功臣太師尚書令兼中

書令天下兵馬大元帥鎮海鎮東軍節度管內觀察
處置等使上柱國吳越國王食邑九萬七千戶實封
一萬六千九百戶入朝不趨劍履上殿錢俶元有元
德上輔廣忠宣義正節振武佐運功臣太師開府儀
同三司秦王荅剌罕中書大丞相上柱國錄軍國重
事監脩國史兼徽政院侍正昭功萬戶府都總使虎
符威武阿速衛親軍都指揮使司達魯花赤忠翊侍
衛親軍都指揮使奎章閣大學士領學士院知經筵
事太史院宣政院事也可千哈必陳千戶達魯花赤
宣忠幹羅思扈衛親軍都指揮使司達魯花赤提調
回回漢人司天監群牧監廣惠司內史府左都威衛
使司事欽察親軍都指揮使司使宮相都總管府領
大禧宗禋院兼都典制神御殿事中政院事宣鎮侍
衛親軍都指揮使司達魯花赤提調宗人蒙古侍衛
親軍都指揮使司提調哈刺赤也不干察兒領隆祥
使司事俶藩臣也全忠伯顏權臣也

秦斑列侯在丞相上漢丞相必封侯以故無列丞相
上者後御史大夫亦在列侯上若唐開元以前加三
公者雖不與政事係正拜官尚在宰臣之上代宗以
後稍不然矣而僕射為故相其體尚尊司空不由宰

相加自王思禮始宋時班次東宰相西為親
王趙普罷相後始加晉王光義侍中班宰相上至太
平興國七年趙普復為司徒無侍中秦王廷美舊以
太師中書令班宰相上至是復居普下仁宗初曹利
用以樞密使加司空侍中欲班宰相王曾上不可神
宗初陳升之初拜平章事時文彥博以舊元相為司
空侍中兼樞密使特詔居升之上固辭而止然則親
王使相雖至三師三公不敢班宰相上其三師三公
僕射不帶平章事不敢班宰相上也又唐書成用官
高者一人書曰歐陽脩以宋祁先達乃分注紀志表
屬脩而列傳屬祁至於進書次序俱在祁前然考其
官則祁以殿學無侍讀龍圖二學士吏部侍郎河內
郡開國公脩以翰林龍圖二學士給事中安樂郡開
國侯官序脩本在下也蓋祁出知鄭州而脩實為學
士故耳此亦足以見宋官秩之次

舟州山人四部稿卷之一百六十五

舟州山人四部稿卷之一百六十六

吳郡王世貞元美著

說部

宛委餘編

秦始皇滅六國寫其宮室作之咸陽北坂上自雍門
以東至涇渭交處殿屋複道周閣相屬然各自爲區
雖一瓦一甍之造亦如其式各書國號不相雷同皆
布其所得諸侯美人居之如在其國鐘鼓帷帳不移
而具至於出狩豐貂東至獬豸南來又有玄旗阜旒
之制罕車之飾寫九王之廷於咸陽北坂車輿之綵

各樹其文所謂秦人大備而陳戰國之後車者也見秦史晉志爲詳

按三輔舊事西京雜記諸書阿房宮前殿東西三里南北五里前庭中可受十萬人車行酒騎行炙千人唱萬人和一云上可以坐萬人下可以建五丈旗關內離宮三百關外四百餘漢未央宮周回二十八里前殿東西五十丈深十五丈高二十五丈有殿閣三十二至孝武以木蘭爲樊棹文杏爲梁柱金鋪玉戶華榱璧璫雕楹玉碣重軒鏤檻青瑣丹墀左城右平黃金爲壁帶間以和氏玕玉風至其聲玲瓏然也未

央在城西偏而長樂在東太后多居之周回十九里又有桂宮北宮明光宮在北周回各十餘里孝武又建建章宮於未央宮西長安城外跨城池作飛閣通之構輦道以上下周迴三十里宮正門曰閭闔高二十五丈左鳳闕高二十五丈右神明臺門內北起別風闕高五十丈對峙井幹樓高五十丈輦道相屬焉連閣皆有罽毼前殿下視未央其西則廣中殿受萬人廟記云北闕門高二十五尺又有鳳皇闕高七十七丈五尺又畿內千里京兆治之前乘秦嶺後越九峻東薄河華西涉岐雍內外宮一百四十五所隋文帝

遷都其正宮正殿皆名大興隋煬帝因之致美於西苑後多幸東京江都以及唐改名太極宮然俱無所增飾高宗於宮東北取苑地建大明宮其廣袤亦及五里尚未能建章之半也宋東京宮殿初因朱梁之舊建隆三年倣洛陽宮殿脩之始爲壯麗然周迴不過五里至晉南渡都建康朝宴所臨止東西二堂宮門之外編竹以爲儲胥而已宋南渡都臨安以州治爲行宮制度簡省垂拱大慶文德紫宸祥曦集英六殿隨事易名實一殿重華慈福壽慈壽康二宮重壽寧福二殿隨時異額實一宮延和崇政等四殿本一

射殿天章龍圖等九閣實天章一閣大內尤庠隘階墀僅三級比於江南大家而已秦漢大駕屬車八十一乘法駕屬車三十六乘晉過江後但六乘而已天子無復六馬三乘五路皆駕四而已無復五時車有事則權以馬車代之建旗其上其後但以五色木牛象五時車豎旗於牛背行則使人輿之一何凌替也○梁孝王廣睢陽城七十里西苑方二百里作曜華宮築兔園園中有百靈山膚寸石落猿巖栖龍岫又有鴈池池間有鶴洲鳧渚其諸宮觀相連延亘數十里奇果異樹珍禽恠獸畢備王日與宮人賓客弋釣

其中是漢之諸王踰於後世人主也梁冀廣開園囿
祿土築山十里九坂以象二嶠深林絕澗有若自然
奇禽馴獸異方珍怪畢有是漢之貴戚踰於後世人
主也袁廣漢於北山下築園東西四里南北五里激
流水注其中橫石爲山高十餘丈連延數里養白鸚
鵡紫鴛鴦蒼犛牛青兕奇獸珍禽委積其間積沙爲洲
嶼激水爲波濤致江鷗海鶴孕雛產鷄延漫林池奇
樹異草靡不植培屋皆徘徊連屬重閣脩廊行之移
晷不能徧是漢之富民踰於後世人王也

中國之人長一丈者人君則黃帝堯與文王人臣則

吳伍員漢巨毋霸俱十尺毋霸腰帶十圍員眉間一

一尺元魏南明太守慕容叱頭長一丈圍九尺禹短

一寸春秋演孔圖孔子長十尺一云九尺六寸按莊

子所謂自腰以下不及禹三寸則後說似矣宋程史

載有唐某者與其妹各長一丈二尺

禹長九尺九寸湯九尺秦始皇八尺七寸漢高祖七

尺八寸光武七尺三寸昭烈七尺五寸宋武帝七尺

六寸陳武帝七尺五寸宇文周太祖八尺項王八尺

二寸韓王信八尺九寸一曰八尺五寸王莽七尺五

寸劉淵八尺四寸劉曜九尺四寸慕容皝七尺八寸

姚襄八尺五寸冉閔什翼犍宇文泰皆八尺慕容垂七尺四寸慕容德八尺二寸自唐以後人主長者故少韋康成十五長八尺姜宇十五長七尺九寸劉曜子胤十歲長七尺五寸美姿貌眉鬚如畫人固有少而長若此者胤後止八人四寸不能如其父也

符堅時有申香夏默護磨那俱長一丈九尺爲拂蓋郎一云一丈六尺一云一丈三尺則長之之極者然是外國人也又大秦人長一丈五尺好騎駱駝

孔子曰人長不過一丈然至於骨節專車又孔子所對防風氏也列子龍伯國人長三十丈洞冥記云支

提國人長三丈三尺三臂三指皆以爲寓言瓌說然防風身橫九畝自古記之鄭滿國君長狄僑如長三丈二云五丈犯魯爲叔孫得臣以戈椿喉而死其父緣斯犯宋爲皇父所殺弟焚如先犯齊爲王子成父所殺簡如走至衛復爲衛所殺長狄之種遂絕然則長者僅其君耳且以人三丈而親戰陣未有不斃於矢石者也南海有毗騫國王長丈二頭頸三尺一名長頭王佛長一丈六尺以爲神然其小弟阿難與從弟調達俱長一丈四尺五寸彼時天竺之長者故不少也女子長者明德馬皇后和熙鄧皇后俱七尺三寸劉

曜劉皇后七尺八寸俱以美著稱若今則不以為雅矣惟劉曜長九尺四寸庶幾相稱

中國人短者蔡謨外親王蒙長三尺潁川張仲師長二尺二寸又按論衡云長一尺二寸

人之肥重者安祿山稱二百五十斤司馬保八百斤至孟業千斤極矣業嘗為幽州督辭晉武帝帝稱之果得千斤

○記有廣川趙翁伯者夏月裸卧其孫兒戲以李納臍中數日有殷紅汁液滋流以為臍爛憂而哭目盡腫久之肉盡核出乃知為李孫所戲納也數之得七枚則其臍深不下數寸大亦稱之矣又符秦時大豪王某者錄

於獄其人素雄勇博碩忿而自屠其腹刃入徑寸不能破乃置刀於壁奮身觸之始透其肥重亦可推矣

漢書稱韓博上言巨毋霸輶車不能載三馬不能勝即日以大車駟馬載詣關魏史拓拔猗奄魁岍馬不能勝恒乘安車駕大牛牛角容一石是二人者稱之當在孟業下晉王保上

○項王舉鼎拔山喑鳴吒咤千人皆廢百戰無前膽力威勇足冠千古其它若蜀五丁力士能移山舉萬鈞每王薨輒立大石長三丈為墓志曰荊里秦烏獲又夏育俱能舉移千鈞千鈞蓋三萬斤衛石蕃能負沙一千二百斗當為一百二十石可謂神力矣而俱不聞有戰伐之勲泯泯以

死何也書所載魏任城王曹彰太廟新成萬斤鐘負之而趨擗白象鼻頓之於地以臂繞虎尾伏不敢動然是時海內稱關張為萬人敵不數任城也北魏盧曹長九尺餘勇力與沙門曇讚將嘗以海神脛骨為馬稍以遺齊神武諸將莫能舉惟彭樂強舉之南梁羊侃伏而作虎狀以指抉壁入三寸弓力至二十石泗州十石人各長八尺許執而對擊之俱碎又於壁直上七步橫蹋得五跡而是時海內以高敖曹配項羽不數羊盧也元鄭澣舞劔能使壯士十馬首俱墮而我明稱勇將為常開平傅頴公輩陳有張定邊澣無聞也豈有力者不必有

膽耶一萬鈞當為三十萬斤此恐記者之過

偶閱嚴氏籍沒之數臆記古之富者太史公以貧致官刑故津津談貨殖也

以貴而富其最著者秦魏冉呂不韋楚黃歇漢霍光張安世張禹王鳳等五侯董賢梁冀董卓曹騰等魏曹洪晉石崇王愷王濟徐湛之阮佃夫梁蕭宏朱异羊侃北魏元禧元雍元琛元融李崇隋楊素唐裴寂李林甫楊國忠郭子儀韋宙裴冕元載李德裕王涯楊收吳越孫承佑蜀李昊宋蔡京梁師成韓世忠張俊楊沂中史弥遠韓侂胄賈似道元燕帖木兒伯顏朱

清張瑄其無譏者僅郭汾陽韓蘄王耳

能自力致富者陶朱公白圭猗頓巴寡婦臨邛卓王
孫程鄭宣曲任氏茂陵袁廣漢平陵士孫億東海糜
竺平邑王氏洛陽劉寶長安王元寶王酒胡鄒鳳熾
卽鄒駱駝及勝國倪瓚顧瑛沈萬三皆著在史傳甚
詳

王愷作紫純布障四十里石崇乃作錦步障五十里
敵之愷恒不勝武帝助之賜以珊瑚樹高二尺許以
示石便以鐵如意擊之應手而碎君夫方惋惜以爲
疾已之寶石徐曰不足多恨今還之卿乃命左右悉取
珊瑚樹有高三四尺者六七株條幹絕俗光彩耀目
如君夫比者甚衆乃恍然自失外國有進帝火浣布
者帝服以幸季倫季倫身敝服候帝左右從奴五十
人悉衣火浣衫

秦皇爲巴寡婦築女懷清臺又令猗頓得朝見比封
君卓王孫有綠熊皮百雙漢武帝令進二十雙至唐
明皇見南山白龍問左右俱不見獨王元寶見之以
至富與至貴敵也元寶又謂明皇請以南山一樹挂
臣一縑山樹有盡臣縑無窮又黃巢亂後脩宮闕有
商兒王酒胡助錢三十萬貫後脩安國寺成上幸之

爲擊十杵施錢萬緡羣公有擊至五杵者一日王酒
胡乘醉入連撞百杵徑輦十萬緡寘寺而去一布衣
乃敢與人主酬酢遂爭雄長不減齊奴

梁龔父子拔權垂二十年貪聚無極而斥賣家財三十
十餘萬萬董賢之幸不過三年耳而斥賣家財至四
十三萬萬賢不聞納賄蓋傾府庫以益之也梁武帝
幸臨川王宏第錢千萬一庫懸一紫標凡三十間僅
三萬萬而梁時錢薄小不能三分之一其他布絹上
綿漆密紵蠟朱砂雜貨物積亦梁董之亞矣

梁孝王薨時餘黃金四十萬斤吳王濞金錢布滿天
下漢時黃金多而王侯巨富乃尔

卓王孫家僮千餘人程鄭折國石崇俱八百人袁廣
漢九百人王氏以五侯刁逵楊素各數千人高陽王雍
六千人郭汾岷切三千人呂不韋麋竺萬人

逵田萬頃
素馬萬匹

史稱窮奢極欲者五侯羣弟爭爲奢侈賂遺珍寶四
面而至羅鍾磬舞鄭文作倡優狗馬大治第舍起土
山漸臺洞門高廊閣道連屬相望郭况起高閣以量
金玉錯雜寶以飾臺榭懸明珠四垂晝視之如星夜
望之如月梁龔大起第舍妻孫壽亦對街爲宅殫極
土木互相誇競堂寢皆有陰陽奧室連房洞戶柱壁

雕鏤加以銅漆窗牖皆有綺疏青瑣圖以雲氣僊靈
臺閣周通更相臨望飛梁石磴陵跨水道金玉珠璣
異方珍恠充積私室遠致汗血名馬又廣開園囿採
土築山十里九坂以象二嶠深林絕澗有若自然奇
禽馴獸飛走其間冀壽共乘輦車張羽蓋飾以金銀
游觀第內多從倡伎鳴鐘吹管酣謳竟路或連繼日
夜以騁娛石崇婢美艷千餘人常擇其姿容相類者
數十人裝飾衣服大小一等調四方玉付工爲倒龍
之珮縈金爲鳳冠之釵結紳繞楹而舞欲有召者不
呼姓名悉聽珮聲視釵色各含異香使行而咲語則

口氣從風而颺又屑沈水香末布象牀上使所愛踐
之無跡者卽賜珍珠百篋初最幸爲翔風後翔風退
房幸綠珠珠弟子宋禕有國色善笛後入明帝宮中
蕭宏後庭數百千人皆極天下之選所幸江無畏器
服珍異侔於東昏潘妃寶襍直千萬羊侃在衡州於
兩艫符起三間通梁水齋飾以珠玉加之錦繡盛設
帷屏列女樂垂潮解纜觀者填溢嘗宴北使陽斐賓
客三百餘人食器皆金玉雜寶奏三部女樂及夕侍
婢百餘人俱執金花燭魚弘侍妾百餘不勝金翠服
翫車馬冠絕一時有眠牀一張皆是麈尾四面周匝

無有一異通用銀縷金花壽福兩重爲脚高陽王元
雍居第匹於帝宮白壁丹楹窈窕連雲僮奴六千妓
女五百隋珠照日羅衣從風時河間王琛欲敵之造
文栢堂如徽音殿置玉井金罐以五色絹爲繩伎女
三百盡皆殊色求西域千里馬其次七百里者十餘
匹皆有名字以銀爲槽金爲環鎖嘗會諸王陳諸寶
器金甌銀甕百餘口甌擎盤盒稱是餘器有水精鉢
瑪瑙琉璃盃赤玉卮數十枚工作奇妙中土所無又
陳女樂及諸名馬復引諸王案行府庫錦罽珠璣冰
羅霧縠充牣其內謂人曰不恨我不見石崇恨石崇
不見我楊素後庭伎妾曳綺羅者以千數第宅奢侈
僭擬宮禁有鮑亨者善屬文殷胄者工草隸竝沒爲
家奴秦王楊俊爲妃作七寶羃離車不可載以馬負
之而行又爲水殿香粉塗壁玉砌金階梁柱棖棟之
間周以明鏡間以寶珠極瑩飾之美與賓客伎女絃
歌其上張易之爲母阿臧造七寶帳鋪象牙牀織犀
角羃貂褥蛩毳氍毹汾晉龍犀臨河鳳翮爲席宗楚客
造一宅皆是文栢純帖沈香和紅粉泥壁文石爲階
砌安樂公主造定昆池四十九里累石爲山以象華
岳引水爲澗以象天津飛閣步檐斜橋磴道衣以錦

繡畫以丹青飾以金銀瑩以珠寶又爲九曲蓮花臺
泉於臺湧出窮天下之壯麗楊國忠諸姨弟五家聯
亘治錦繡琢金玉者大抵千人變化若神僊每帝幸
華清宮五家隊合炯若萬花川谷成錦繡遺鈿墜馬
瑟瑟珠翠狼籍於道香聞數十里宅中沈香亭禁中
遠不逮虹霓屏風雕刻前代美人形服玩衣服皆衆
寶雜砌水精爲地外以玳瑁水犀爲押絡以珍珠瑟瑟
瑟非人力所製元載芸輝堂于闐香芸潔白如玉屑
以塗壁沈檀爲梁棟金銀爲戶牖中設前虹霓屏風
紫綃帳輕疎而薄風不能透冬溫夏涼有龍髯紫拂

色如爛椹削水晶爲柄刻紅玉爲環紐所幸薛瑤英
肌體自香處金絲帳却塵褥李昌夔在荊州打獵大
脩裝具其夫人獨孤氏亦出女騎一千皆着紅繡襖
錦鞍鞞鳳靴銀鐙于頔在襄州點山燈油一止二千
石張鎡宴客牡丹會旣集坐一虛堂寂無所有俄問
左右云香發未荅云已發命卷簾則異香自內出郁
然滿坐羣伎以酒斝絲竹次第而至別有名伎數十
首戴牡丹衣領皆繡如其色歌昔人所作牡丹詞進
酌而退前後花與伎凡十易杯器皆如其色酒竟歌
者舞者數百人列行送客燭光香霧歌吹雜作恍然

若僊遊

自古恩賞之重未有過於董賢楊素者賢以色素以功賢自得幸旬日間拜侍中賞賜累鉅萬封侯遂進大司馬拜女弟為昭儀位次皇后妻得通藉殿中止賢廬賞賜各千萬數父恭自少府拜衛尉賜爵關內侯妻父為將作大匠弟寬信為執金吾詔將作起第北闕下重殿洞門本土之工窮極伎巧柱檻衣以綈錦武庫禁兵尚方珍寶選物上第盡在董氏而乘輿所服乃其副也及至東園秘器珠襦玉押皆豫以賜賢無不備具又令將作為賢起塋冢義陵旁內為便房剛栢題湊外為徼道周亘數里門闕眾恩甚盛楊素初破齊賜奴婢粟帛雜畜拜信州賜錢百萬錦千段馬二百匹破陳賜物萬段粟萬石加以金寶又賜陳主妹及女伎十四人破吳寇賜綵物三千段江南定賜黃金四十斤銀餅一實以金錢縑三千段馬二百匹羊二千口公田百頃宅一區仁壽宮成賜錢百萬緡絹三千段討突厥賜物二千段黃金百斤突厥破賜縑二萬疋萬釘寶帶遷左僕射賜良馬百匹批馬二百匹奴婢百口山陵成賜物萬段田三十頃米萬石金鉢一實以金銀鉢一實以珠拜綾錦五百疋

賜射手賜金精盤價值鉅萬破漢王諒賜物五萬段
綺羅千疋諒伎妾二十人從幸東京賜甲第一區物
二千段

漢文帝卽位大尉勃賜黃金五千斤丞相平將軍嬰
二千斤朱虛侯章襄平侯通典客揭各千斤宣帝卽
位大將軍光賜黃金七千斤錢六千萬雜繒三萬疋
奴婢百七十人馬二千匹甲第一區漢世賞功之重
如此

按志云黃金方寸爲斤又云一斤卽一金也四兩爲
一斤又曰一斤十六兩愚謂漢書明有賜千金及賜

金千斤之異則一金當爲四兩而一斤爲十六兩也
按漢食貨志武帝時錢益多而輕物益少而貴乃制
白金三品其一曰重八兩環之其文龍名白撰直三
千二曰以重差小方之其文馬直五百三曰復小楮
之其文龜直三百是其時號錢輕昂銀以爲幣而八
兩直三千八錢止直三百也今錢之極重而精者 世
宗朝嘉靖錢每銀一兩直錢七百尚以兩錢當漢錢
一也王莽當篡漢時造錢貨有六品契刀錯刀之類
不論而銀貨二品黃金一斤直錢萬銀八兩爲一流
朱提銀一流直錢一千五百八十他銀一流直錢一

千朱提銀出犍為至精價不可憑以他銀與黃金計之金一斤當直他銀五斤金一两直他銀五兩也正與今不異若金四兩為斤計之則金一两當直他銀二十兩也漢黃金賤而白金貴必不縣絕乃爾又以王莽傳言之群公奏故事聘皇后黃金二萬斤為錢二萬萬則一斤萬錢之說合矣漢賜霍光黃金七千斤當為錢七千萬也周勃黃金五千斤錢五千萬也然銀八兩而直錢一千則八錢止直一百也錢之貴三倍於武帝時矣董賢家財總錢四十三萬萬筭之在武帝時當直龍文白撰直金一千六十六萬六千兩在居攝時為他銀三千四百四十萬餘兩居攝正係哀帝一二年賢家錢直當以後為準後漢供南單于歲一億九十餘萬西域七千四百八十萬然則一億為一萬萬也又段熲征諸羌議以騎五千步萬人車三千兩三冬二夏費約五十四億為五十四萬萬也靈帝賣官公為錢千萬卿五百萬若以前漢錢直計之是公當出黃金五百斤卿二百五十斤是時南單于西域皆賓服而歲供一為黃金一萬九千斤一為黃金七千四百八十斤而三歲征羌之費直黃金五十四萬斤矣萬萬無此理按桓帝時貨輕而財薄

欲改鑄大錢以劉陶言而止然則是時錢不能西漢
十之一也以後鵞眼縲環之類而錢日賤斗米一萬
則又千百而一也或輕或重莫可準則約畧言之孝
武元狩五年至平帝元始中凡一百十五年成錢二
百八十萬萬而宋神宗熙寧八年每年鑄銅鐵錢五
百四十九萬九千二百三十四貫凡貫緡皆百錢當
爲五萬四千萬九百二十三萬四千文不四十歲而
鑄漢百十五年錢若以千錢爲貫緡又當十倍蓋漢
錢精而貴其價六倍於今之上錢唐宋錢薄小而賤
什不能當今上錢一也至於黃金則漢甚多而易得
今極少然其價貴僅十分踰二耳不甚懸也每見漢
黃金以爲富於後世數十倍見唐宋錢緡以爲富於
漢數十倍要而言之漢實富也

郭子儀傳云每歲月俸母慮二十四萬緡一緡爲百
錢則當二千四百萬錢也若一緡爲千錢則十倍之
矣又每入朝上命魚朝恩元載送爲主一宴至費錢
十萬緡按唐自開元二十四年六月總定一品月俸
料八千食料千八百雜用千二百防閣十五千通計
二十四千二百然則一歲俸入錢當爲二十九萬四
百僅二千九百緡餘耳汾陽縱所兼十餘職皆極品

安能百倍其數耶且一宴之費爲十萬緡亦當爲萬餘金矣當是時天下方遭亂戶口歲入有限必不能爾抑史夸言之也

沈存中筆談考樂律改鑄渾儀求秦漢以前量度升斗計六斗當今一斗七升九合秤三斤當今十三兩一斤當今四兩三錢三分始悟所謂黃金方寸爲一斤金一斤直錢一萬或二萬價相等也飲酒一石實可三斗而所謂蓋祿萬鍾辭十萬而受萬與奉黃金萬鎰賜金千斤者皆可類推矣

考功記金有六齊六分其金而錫居一謂之鍾鼎之齊五分其金而錫居一謂之斧斤之齊四分其金而錫居一謂之大刃之齊五分其金而錫居一謂之制殺之齊金錫半謂之鑿燧之齊按上金中金下金皆可和齊獨錫性柔而體易化不能相入豈記所謂錫者非今錫耶

王楙又考周禮廩人月三鬴注六斗四升曰鬴計食米日六升四合也魏李惺曰人食米月一石半是食米日五升也漢趙充國曰以一馬自佗負三十日食爲米二斛四斗麥八斛是人日米八升馬日麥二斗七升也匈奴傳一人三百日食用糲十八斛是人日

糲六升也古斛小漢二斗七升當今五升四合所謂
人食米八升當今二升一合六分食米六升當今一
升六合觀一馬能負米麥至此可以徵其升斗之小
而倉公傳所載人大小腸受水米之數不至可駭矣
第沈存中言六斗爲一斗七升九合而楸則六斗當
爲一斗六升更少升九合似當以存中爲據

劉威碩在蜀車服侈靡豔妾數十能爲聲樂悉教誦
靈光殿賦謝靈運門故恒數百人室宇華曠盡山泉
之美車服鮮麗衣裳器物多改舊形世共宗之徐湛
之產業甚厚宇舍園池貴游莫及伎樂之美冠絕一
時門生千餘皆三吳富人子姿質端美衣服鮮麗每
出人行游塗巷盈滿徐君禕爲湘東王諮議文冠一
府新聲豔語人多諷習尤長部書問無不對善絃歌
好聲色侍妾數十皆佩金翠曳羅綺服翫悉以金銀
閉門盡日酣飲有時載伎肆意游行荆楚山川靡不
游踐是四君者比之王石尚爲黔婁第文士酸寒得
此亦是生天之福

先秦以前美人則有少昊之皇娥赤帝女之瓊樹桀
之妹喜紂之妲己有莘氏周穆王之盛淑人昭王之
延娟延娛幽王之褒姒楚王之息媯晉獻公之驪姬

秦穆公之女弄玉惠文之華陽夫人莊襄王之邯鄲

姬吳王之西施光即夷鄭旦明即脩楚王之鄭袖南威陽

文李園妹梁惠王之閭姬趙武靈王之吳姚燕昭王

之旋娟提謨中山侯之陰后江姬皆在宮掖者也有

仍氏青琴毛嬙孔父妻徐吾犯妹夏徵舒母邾婁顏

夫人皆在下者也漢宮掖則戚夫人高祖慎夫人文帝陳

后阿嬌衛后子夫邢夫人尹夫人李夫人王夫人鈞

弋夫人麗娟武帝王昭君元帝趙后飛燕趙婕妤合德成帝

陰后麗華光武甄后郭后薛靈芸即夜來莫瓊樹陳尚衣

陳巧笑皆魏文帝趙夫人潘夫人吳主鄧夫人吳主朝姝

麗居洛珍潔華吳主二喬孫策周瑜兩楊后胡嬪芳晉武殷

淑儀宋孝武潘妃玉兒東昏侯馮小憐比齊後主張麗華孔貴

嬪陳後主陳宣華蔡容華隋文帝朱貴兒侯夫人袁寶兒

吳絳仙俱隋煬帝武惠妃楊太真唐玄宗王才人武宗兩周后

李後主兩劉妃宋徽宗閨閣則秦羅敷顧夫人張玄江無畏

臨川王宏妾曹洪女荀奉倩婦李勢女桓溫妾樂昌公主徐德無

雙王仙客失行則卓文君鶯鶯非烟虢國夫人狄夫人

達奚盈盈姬侍則馮方女袁術絳樹魏翔風綠珠宋禕

石張靜琬孫荆玉羊佩徐月華脩容豔姿元雍雪兒李密阿

崇張靜琬孫荆玉羊佩徐月華脩容豔姿元雍雪兒李密阿

劉鑒羊紅拂李靖紅綃生薛瑤英元載寵姐寧王紫雲李聽女

寶李愿解愁炕名伎則霍小玉李娃楚娘夜來杜韋娘

史鳳楚蓮香劉採春皆灼灼有名者若退之之桃柳

樂天之蠻素雖見詞章酸士所獲寧堪上駟哉

晉人重容觀以故負美貌能清言即雍容至顯位然

所推重無如衛洗馬叔寶如所云少時乘羊車入市

觀者傾洛城曰誰家玉人後渡江至建康年二十七

矣尚為人看殺其次則杜弘治右軍目之曰膚若凝

脂眼如點漆此神仙中人也人以比叔寶則曰那得

比其中尚容數人又曰衛玠神清杜又膚清一時品

藻若此至於何晏裴楷王衍潘岳王濛之徒皆以美

貌聞豈一時好尚之至造物亦遂移嚮耶

向魍穉子瑕安陵龍陽鄧通董賢林仁遇以色進外

張昌宗張易之以色進內俱至卿相貴富者也

太康以後人顯外色至多怨女五行占以為災漢哀

幾於禪位符主竟成敵國季龍為之殺妻僧達遂將

阮姪又有楚國王仲先聞潘章之美因願為友遂同

衾枕篤於伉儷未幾偕沒其家憫之葬於羅浮山忽

生一樹柯條枝葉無不相抱時人號曰共枕樹更為

異矣

晉獻公欲伐郭而憚舟之僑存荀息曰周書有言美

女破舌乃遺之女樂以亂其政舟之僑諫而不聽遂
去因而伐郭遂破之又欲伐虞而憚宮之竒存荀息
曰周書有言美男破老乃遺之美男教之惡宮之竒
宮之竒以諫而不聽遂亡因而伐虞遂取之然則虞
號之君一好內一好外也

弇州山人四部稿卷之一百六十六

